

Գեղեցի՛կ առաջարկություններ, գեղեցկագո՛յն խրատներ, մարմինը քառասուն կտորի բաժանել եւ անոր երեսունեութը կտորն առնելով՝ օսմանեան կառավարութիւնն 2/40 - ի վերածել եւ անոր ըսել.

Ա՛լ անհո՛գ եղիր, քու ամբողջութիւնդ երաշխաւորուած է. Եւրոպայէն մի՛ զատուիր, որ փրկութիւն գտնես:

Ո՛վ ամբողջութիւն...

Ո՛վ փրկութիւն...

10 Օգոստոս

Աւստրիական դեսպանն այսօր Ս. Պատրիարք հօր այցելութիւն ընելով՝ երկարօրէն տեսակցեցաւ Նորին Սրբազնութեան հետ հայկական խնդրոյն վրայ: Խօսքերն արդեօք ե՞րբ գործի պիտի փոխուին, Աստուած իմ:

**

Ալպանիացիները կպատրաստուին դէմ դնելու նաւային ցոյցին, որ տեղի պիտի չունենայ, երէկուան հասած հեռագրի մը նայելով:

**

11 Օգոստոս

–Կնի՛կ, սա օղերդ տո՛ւր:

–Ի՞նչ պիտի ընես:

–Ինչո՞ւ կհարցնես:

–Ինչո՞ւ չհարցնեմ:

–Պիտի ծախեմ եւ զքեզ հետս առնելով Հայաստան պիտի երթամ:

–Ես սրկէ հունա չեմ երթար:

–Հապա ամեն օր գլխուս միսը կ'ուտէիր, որ Հայաստան երթանք:

–Բայց չէի ըսեր, որ օղերս ծախենք ու այնպէս երթանք:

–Ըսել է թէ օղերդ Հայաստանէն աւելի կսիրես:

–Այդ ի՞նչ խօսք է, Հայաստանը կրնա՞մ ականջներէս կախել...:

Ըստ իս՝ ասանկ կիներու ականջները կտրելու է...: